

Genesi

Sapita 1

1-5 Kama kaya goma wen God Anutu kamin main a gariba main ere yomue. Gariba main imore dimba God Anutu Iban nil minin mina pay waa dimue. Kole kole para si bilemue. God Anutu dungwa, aw do. Dungure aw dimue. Aw dungure God Anutu wai kanide yalini nabilungwa kaan i yomue. Aw dungwa si bilungwa ala di kole kole ongure si bilungwa, gilaa kaan i yomue. Kaun ta dimue.

6-8 God Anutu dungure kawa nil bole yene ime taran dungwa, kawa ala di mine omue. Ongure God Anutu kamin kaan i yomue. Kaun sutan dimue.

9-10 God Anutu dungure nil pi ai baan ta

milungure gariba kaa sungwa, u mariba omue.

11-13 God Anutu dungure, komina muru main main a, kul muru main main a, eri muru main main, gariba gul maaride maale sulu dimue. Kaun sutokobe dimue.

14-19 God Anutu dungure are ya, ba ya, kulmama ya u maribe omue. Aw dungwa kaun are sungure God Anutu iru eremue. Gilaa kaun ba ya, kulmama ya dongure, God Anutu iru erungware gariba gul aw dimue. Are ya, ba ya, kulmama u maribe ongware ba kaan muru popay te eruul, te kaan ta ta iru u maribe ongure yalini iru eremue. Kaun sui sui dimue.

20-23 God Anutu dungure bilebale main main a, nil kabe main main, nil ale muru u

maribe omue. Nil kabe para wen maale sulu dimue. God Anutu kauba main main para ere yongure kauba kaan kaan, maale sulu dimue. Kaun anan kole muru dimue.

24-25 God Anutu dungure, kalkan para wen, awi bolima te, biin bera te, nogi kabe te, erebi baymil te, dui bulaa te pilepale kabe gariba gul u maribe omue. Yalini oniba ya, kal para wen kire dire ongwa para ere yomue. Kal para wen God Anutu ere yongwa maale sulu dimue. Kwi milungwa kabe para wen God Anutu komina kulderagi nenangwa tomue.

Sapita 2

1:26 - 2:25 God Anutu ibal ere yomue. Yalini yal abal para ere yomue. God Anutu milungwa mere ibal kobe ere yomue. God

Anutu gariba wore a dagi sire yal ere yomue.
Yal guman kuun ale, God Anutu giran miin pu
dungure alide u ibal omue. God Anutu
gariba wore, yal ere yere, kaan Adan yomue.
God Anutu komina yalungwa gul, Adan awli
suna piride baan ta maale yongure milemue.
Komina gul, Iden gariba nil nule binan dimue.
Kwi milungwa eri komina gul suna dimue.
Main pirungwa eri para dimue. God Anutu di
Adan tongwa, i komina gul kenin ero. I eri
milin komina gul suna muru nenanba, main
pirungwa eri, gul suna wen dungwa, eri milin
i nenanga i kal wai dungwa, kal nigi dongwa,
main piranwa. Eri milin i, nekio, nenanga
gulanwa. Awi bolima te dua kabe God Anutu
gariba ere yongwa, awli yal milungwa gul

ongure Adan kal kobi kaan yomue. God Anutu
iru dungwa, Adan inin milungwa paykungwa
kanide, abal ere yere yalini terabinwa.
Abalini yal aki diride, ebinbi milamua
dimue. God Anutu Adan suul erungwa ul aru
di paangure, God Anutu Adan daan yobilaan
teranta piride, a kube simue. God Anutu
daan yobilaan piride abal ere yomue. Adan
ale milungure, God Anutu abal awli yal i
milungwa gul umue. Adan kanide iru dungwa,
i inin teran milebingi, God Anutu na daanan
yobilaan i ere yongware na i kaanin abal
yobinwa. God Anutu iru erungware yal nen
man piseride, abal iride, yalini sui su
wayde si dawle milide, yal sui teran
milemue. God Anutu yal abal iru di tongwa,

i gan kulide kalkan muru ke milo. Yasui
yorawan bole milimba gay gulekemue. God
Anutu kalkan ere yeride kanide wai wen
piremue. Kaun anan kole muru kole teran
dimue.

2:2 God Anutu kalkan muru ere ye we siride,
yalini kaun anan kole muru kole sutan imore
ul paimue. Kaun i kaan, erin kaun yomue.

Sapita 3

1-7 Oniba naanin paangwa milemue. Milide
iru di abal tongwa, i komina gul eri milin
ta nekio, God Anutu iru dimo? I eri milin
ire nenanga, i gulekinanwa, God Anutu
milungwa mere milanwa. I kal wai dungwa,
kal nigi dongwa main piranwa. Di tobinga
God Anutu piremua dimue. Dungure abal eri

milin kane daan gulide ule nomue. Neride
winbi kole tongure nomue. Yasui nere pare,
main wen piremue. Yasui yorawan bole
milungwa piremue. Pirungwa yasui koray
piralde eri arin si bilemue.

8-21 Are baa sungure God Anutu komina gul
suna kol waremue. Yal, ebinbi bole, God
Anutu egile mi dire ungwa piride, eri main
ale aal kule paamue. God Anutu iru gala
dungwa, i alde miline? Adan waa dire iru
dungwa, i egile mi dire unga pirebinwa. Na
yorawan bole milebinga, na kurul piride aal
kule paabinwa dimue. God Anutu iru dungwa,
ibena i iru di tome? Manaa dibinga eri
milin i neno? Yal iru dungwa, abal i na
tenga eri milin na tongure neiwa. Abal

dungwa, oniba kakibi di na tongure eri milin
ule neiwa. God Anutu di oniba tongwa, i
iru eringi, kubinin imore kire di ware
milanwa. Gariba i kol dinamua. I gawlin
te abalini gawlin bole kura bilangwa na iru
erabinwa. I yalini kawn biinin sinamba
yalini i gibilin mina samua. God Anutu iru
di abal tongwa, i gaan kule nenanga kaun,
giil binanbile sinamba, wininbi nomanin
tenangare i kenin eramua. God Anutu di
Adan tongwa, i kal iru eringa gariba suul
bine di maanangwa mere iru erabinwa.
Komina te eri milin nenanga konagi poraa
painamua. Konagi iru ere milangal milanga
eme gulanwa. Na i gariba ere yobinga, i
kwi gariba nanwa dimue. Diride pare

kabenogi gain iride si bilide gal mere
tongure yal sui piremue. Abalini gariba
ibal muru man milungure Adan ebinbi kaan Ewa
yomue.

22-24 Yal abal sui kal wai dungwa, kal
nigi dongwa main piremue. Ibal kwi milungwa
eri milin para nekinamadire God Anutu yal
nuse mena erungure yal sui komina gul wai
piseremue. Piserungwa ibal gariba gul
konagi eremue. God Anutu angelo awli komina
gul binan i piride kwi milungwa eri sipere
dimue. Piride di kuba pera naba erungwa
aa tomue.